

tur, contrarium habet; Cælum non habet contrarium, Ergò Cælum non gignitur nec corrumpitur, & hoc passim multis aliis rationibus confirmat.

In varias etiam abeunt sententias, moderni; Num scilicet divinitus de facto corrumpendi sint Cæli in die extremi Judicii? affirmantibus aliis, aliis negantibus. Affirmantes adducunt varia Scripturæ loca, Ps. 101. v. 27. *Opera manuum tuarum sunt Cæli, ipsi peribunt.* Luc. 21. v. 33. *Cælum & terra transibunt.* 2. Pet. 3. v. 10. *Cæli magno impetu transibunt &c.* Augustinus tamen lib. 20. de Civit. c. 14, 16, 18, & 24, per Cælos in his locis intelligit aëreum Cælum, quo sensu dicuntur aves, volucres Cæli, ut supra. Quem secuti Suarez, citans S. Pet. d. loco paulo ante ver. 5. ubi inquit: *Cælos jam olim extitisse per Dei sermonem, & Terram ex aqua & in aqua consistentem, is autem qui tum erat Mundus, aqua inundatus periit; qui verò nunc sunt Cæli ac Terra, eodem sermone reconditi, asservantur igni in diem damnationis & exitii impiorum &c.* Quæ verba patiuntur hunc sensum, quod Cæli qui eluvione aquarum tempore Noæ perierunt, in die iudicii igne transituri sint; Tempore autem diluvii Sphæræ cælestes non perierunt; Ergo non peribunt in die Judicii. D. Thomas in 4. d. 47. & 48. Pererius lib. 1. in Gen. q. 1.

Cæli an transibunt?

& 2. *Connimb.* lib. 1. de Cælo, e. 3. q. 1. art. 3. *Tann.* 1. p. d. 6. q. 4. dub. 5. n. 5. Quando autem ibi dicitur: *Futuros Cælos novos & Terram novam*, intelligitur Cælos illos qui actu sunt, ita quasi innovatum iri, ut videantur novi, sicut anno vertente semper videtur nova Terra redeunte Vere, cum sit nova facies rerum. Plura vide infra lib. 5. cap. ult.

Porro, quidam dicunt Cælos esse corpus; quorum alii statuunt esse corpus simplex, alii non corpus simplex: si est corpus simplex, non constat materia & forma, si verò non est corpus simplex, tunc componitur ex materia & forma.

Cæli statuuntur corporeum quid.

Cæli an moveantur naturâ & à principio activo intrinseco: an ab Intelligentiis, de hoc quoque disputatur; Quidam dicunt moveri eos à solo Deo; communior tamen sententia Peripateticorum affirmat, moveri ab Intelligentiis; Quod quia invaluit apud omnes pene istos, nefas censetur id inficiari.

Motus Cælorum unde?

Est & communis conclusio Astro- nomorum & Philosophorum, Cælum habere figuram perfectè sphæricam, utpote ad motum circularem aptam; Probatur id ex positione suscepta, nimirum si Cælum non esset sphæricum, Vacuum futurum extra Cælum. Sed quid de his omnibus judicandum, sequenti lib. patebit.

Cæli Figura.

CAPUT XXXII.

De Firmamento & Aquis supra illud, in S. Literis.

Primo cap. Geneseos scribit Moyses: Deinde dixit Deus, esto RAKIAH, id est, *Expansum* (quod in quibusdam Scripturæ exemplaribus sonat *Firmamentum*) inter Aquas, ut sit distinguens inter aquas unas & alteras. Fecit ergo Deus hoc *Expansum*; Quod distinguit inter has aquas, quæ sunt ab infra *Expansi* istius, & aquas illas, quæ sunt à regione supra *Expansi*: & fuit ita. *Expansum* autem hoc Deus vocavit SCHAMAIM (quod idem secundum nonnullos est dicere: *Ibi Aquæ*; interpretantur autem Cælum) *Et sic fuit vespera, & fuit mane diei*

Expansum in S. Scriptura, interpretatum Firmamentum.

secundi. Postea dixit Deus, confluant aquæ istæ, quæ sub hoc Schamaim (Cælo) sunt, in locum unum & conspicua sit arida, & fuit ita. *Aridam* autem vocavit Terram, singula verò aquarum receptacula, vocavit Maria &c. Post (vers 14.) dixit Deus, *sunto Luminaria in Expanso* (Firmamento) Cæli &c.

Ex quibus apparet, quod *Expansum*, Firmamentum seu Cælum, sit unum idemque. Quia verò tam in dicto hoc cap. Gen. quam passim in Scriptura, Cælum sæpius intelligitur pro Cælo aëreo, quando nimirum aves dicuntur: *Volucres Cæli*: nubes vocantur, *Nubes Cæli*

Firmamentum seu Cælum aut Expansum sunt unum & idem.